



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 8

**Trump-i Russia aser Ukraine na tsungda anogo
3 atema ceasefire benoka sangdong**

**Fernandes nem FWA Footballer
of the Year narokum agutsu**



VOL. XXIII ISSUE NO. 206 (ADOK 206) DIMAPUR AMUNGNÜ (SUNDAY) MONUPII (MAY) 10, 2026

₹ 5.00

NPF Farmers' Wing-i Nagaland nung aluyimertem den ajurutepe senzutsu

Kohima, May 9, 2026 (TYO): Naga People's Front nung Central Farmers' Wing (CFW)-i state ajungalen "Appreciative Inquiry Tour" agitsü osang metetdaksüogo.

Nagaland nung aluyimertem den ajuruteptsü, parnok khuretem angatetsü aser aluyimba maparen tasentem lemsateptsü atema iba sentong agitsü.

"Iba tour nung district ajunga asemsü aser Tuensang, Mon, aser central regions nung telok balala asem lemsar senzutsu" ta NPF Central Farmers' Wing president Vikheho Swu-i ashi.

Iba mapa ya aluyimer aser entrepreneurs jangjatsü aser sorkar teyari agia mesüra magii mapa tajung inyakba ajitetsü. Iba tour nunsa aluyimba senmang ajungketba yimtsungtem metetsü ta pai ashi.

"Yimtsungtemi local products sayua benjung ayongzuka parnok sobaliba senmang sayur. Iba ajanga yimdaklir nem senotsü lenmang lapoktsür aser rongsenketzung tsutsü ajangzük" ta Swu-i ashi.

Sorkari seeds & saplings, farm tools & machinery agütsüba den crop clusters jangjaba maparen ajanga aluyimba ajungketer ta paisa shisem.

"Iba tour ajanga Naga aluyimer tajungtem ajitetsü aser parnoki inyaktetbatem ajungketsü. Onoki Krishi Vigyan Kendras (KVKs), Agri and Allied departments, aser field officers den ajurutepe sensaksemsü aser parnoki aluyimba wadang nung shilem agiba tali tajungba angatetsü" ta Swu-isa metetdaksü.

Agriculture department,

financial institutions, banks, KVKs aser Indian Council of Agricultural Research (ICAR) ajanga Nagaland nung aluyimertem yariba atema tenungsang agütsür ta paisa shisem.

"Nagaland nung aluyimertem ayongzükba tulu ajurubatem rongnung aluyimer ajema akümba lir kechiyong lanuputui sorkar mapa ang inyaktü jangrar. Tanü asenoki aluyimba wadang reprangdangra taintemi dang inyaker aser lanuputui aluyimsü melena sorkar mapa ang inyaknür" ta Swu-i ashi.

"Tanü tsungsang-mongpu kanga melenshiba ajanga akhidang nungi aluyima aruba inyakyim nung tetsükdaksü ajurur. Iba khuret koktetsü atema aluyimertem climate-resilient crops amshitsüla aser aluyimba

inyakyim melenshitsüla" ta paisa metetdaksü.

"Tanü asenoki aluyimba modernize asütsü aser tekong lu ayimba nungi tanü asung aluyimba maparen inyaktü atema sorkar aser nübertem külemi lemtetem agitsü nungdaker. Tanü avocado, coffee, rubber aser kiwi amala modern crops tsünüteper saka tekong lu ayimba ya Naga sobaliba aser maitsü den arokaroka sendaktepa lir" ta Swu-i ashi.

"Tekong lu ayimba ya jang dang masü saka ajak dena lir. Asen putiotsü, ken aser sobaliba ya iba den sendaktepa lir. Asenoki modern farming atema lemtet agidang village level nung aluyimertem dendaktsütsüla" ta paisa ashi.

Iba tour ya NPF pusemertem atema dang asü koda ta osangbeneri asungdangdang

"assembly constituency 60 prong nung NPF party divisions ajanga maparen inyaktü saka ajaki shilem agitsü akok kechiyong Nagaland nung tang opposition maliba sorkar lir" ta Swu-i langzü.

"Iba tour ajanga aluyimertem department balala nungi osangtem metetsü aser iba ajanga seeds, saplings aser agricultural schemes amala angutsüba nung teyari angutsü" ta NPF CFW general secretary Chikrokroyo Kezo-ia ashi.

"Nagaland nütsung yongsük 70% jungnüa aluyimba nung metaloka lir aser iba jagi linük kübok tangalen ama Naga nung aluyimertem central aser state government schemes nungi tajangzük agitsüla" ta NPF CFW secretary & administrator Nguto Assumi-ia ashi.

WCYO President dak teka sangshiba aitsür

Dimapur, May 9, 2026 (TYO): May 2, 2026 nü Naga United nung Western Chakhesang Youth Organisation Wekupe Therie dak teka sangshiba osang angashia kanga aoksar aser mepelar ta Western Chakhesang GBs Association-i metetdaksü.

"Inato Chishi aser pa den yaritepertermi Wekupe dak teka sangshi aser iba inyakyim ya tang tasen inyakba ka masü saka olemteptsü melena ozung alema inyaka arur. Ken o tilateratem timi angatetteptsü melena tashiyim amshia tuluba kümdaktsür" ta parnoki ashi.

Western Chakhesang Youth Organisation President ya lanurtemi shimtetba lennir ka lir aser kuli kecha melii amak. Iba ya Naga nung ajak amakba ama lir kechiyong tanishir ka dak yamai beshira kecha masüba nisungtembo lendong tulu ajurutsü ana nung lir ta Western

Chakhesang GBs Association-i metetdaksüogo.

Western Chakhesang GBs Association-i Inato Chishi aser pa den yariteper ajak aputsü aser ozung tapet kübok ken o benoka angadangsü takhangba agütsüogo.

Parnokisa district administration aser police dang nungi ibala tashiyim mapa inyakertem ozung tapet agi merenshitsü ta nangzüksü akhanger.

GBs Association-isa Wekupe Therie nem medical aser legal support agütsütsü takhangba agütsür.

Parnokisa civil societies, Hohotem, kaketshir teloktem aser tangatetba shitak aliba senso ajakin iba tatalokba khukhua aitsütsü ayongzükogo. Ola madoki yutsüba ajanga asung item mapa inyakertem tali tasütaitba akümtsü ta parnokisa shisem.

West Bengal nung temelenshi alitsü: Neiphiu Rio

Guwahati, May 9, 2026 (Agencies): West Bengal nung BJP sorkar tasenba kübok kanga tejakleni renloka aotsü aser state nung yimtenren melenshiba ya kobi melii ajitetsü ta Nagaland Chief Minister Neiphiu Rio-i osangbener den jembidang ashi.

Linük maneni tejakleni aoer aser West Bengal nung alirtemi sorkar tasen kübok temelenshi tulu ajangshitsü ta Rio-i ashi.

"Suvendu Adhikari-i West Bengal Chief Minister inyaktü tezungzüktep agiba ya state nung otsütsü temelenshi ka lir" ta BJP Rajya Sabha MP Rahul Sinha-ia ashi.

Sorkar tasen ka akümba ajanga Bengal nung yimtenren

tsütsü temelenshi tulu ka adoker aser iba tezungzüktep agiba sentong ya Rabindranath Tagore tasoba anogo den külemi agishir ta Sinha-isa ashi.

Taküm West Bengal assembly elections nung Suvendu Adhikari-i Nandigram aser Bhabanipur constituency tem nungi toktep aser pai Bhabanipur nung votes 15,000 temai Chief Minister Mamata Banerjee madak takok nguteta liasü.

Iba sentong nung Union Minister tem- Rajnath Singh, J. P. Nadda, aser Dharmendra Pradhan, Tripura Chief Minister Manik Saha aser Assam Chief Minister Himanta Biswa Sarma nung aden.

Jangpetkong nung shiruru metsürtem nem teyari agütsütsü



Khar yimtak Department of Animal Husbandry & Veterinary Services, Nagaland ajanga 29 th Jangpetkong Assembly Constituency nübur shiruru metsürtem nem teyari agütsütsü asoshi tenzükba sentong ka agir kelen Advisor Wb. Temjenmenba aser sentong nung shilem agirtem külemi tangokba noksa.

Khar, Monupii/May 09 (TYO): Tanü Khar yimtak Department of Animal Husbandry & Veterinary Services, Nagaland ajanga 29 th Jangpetkong Assembly Constituency nübur shiruru metsürtem nem teyari agütsütsü asoshi tenzükba sentong ka agiogo.

Tanü iba sentong nung Hon'ble Advisor of Transport & Technical Education Wb. Temjenmenba-i jembidang sorkar ajanga shiruru metsür nüburtem nem teyari agütsüdi ta asüdag nüburtemi iba maongkaji agia meranga inyakang ta ajungshiba den ano paisa Jangpetkong nüburtemi iba temoatsü ya amshia shia Jangpetkong tsükongi Mokokchung district peria agütsütetsüsa inyakdaksüner ta ajungshia jembi.

Advisor Temjenmenba-isa Naga nung shi kanga achir saka tia maka shirurtem asür, anungji tanü putu scientific

inyakyim aika lir, anungji ibaji meteta inyaktüla aser iba denji külemi ano asen nüburtem vaccine agütsütsü yimya mesüba, anungji vaccine agütsütsü yimya sübatsüla, kechiaser vaccine agir alinung insurance angutsüta metetdakja ashi.

Jangpetkong nung shiruru metsürtem asoshi mezung kümba pai insurance agütsütsü ta Advisor Temjenmenba-isa adenshia aliba par assembly constituency nüburtem dang metetdakja liasü.

Kasa sentong nung Tsüngrem lenisüba jazüka Khar Baptist Arogo Pastor Wb. L. Kumzük Walling ajanga sarasademar tenzük aser Village Council Khar Chairman Wb. Limatoshi-i tarur pela agizükba o jembi aser Director, AH & Veterinary Services Dr. Kuokehebi Gwirie-i tayongzükba o jembi aser Piggery

Entrepreneur, Dibuaia Wb. Imtiakum pai ak metsüba nung ajangshia arubatem lemsateper aser Chief Veterinary Officer Mokokchung Dr. Tiachuba-i tepela o jembiba den Deputy Director AH& VS Dr. Tajungyuba ketdangsüba nung sentong agia liasü.

Iba sentong temer kelen Hon'ble Advisor of Transport & Technical Education Wb. Temjenmenba-isa osang zülurtem den jembidang Jangpetkong lenmang Changki X-Junction nungi Dibuaia tashi tsüngküm arudar nung inyaktü sentong renema lir, ibaji yanglutsü asoshi India sorkari teyari agütsütsü nangzükogo aser ibaji asoshi India sorkar aser Nagaland Chief Minister Dr. Neiphiu Rio dang pelaba metetdaksür, iba den külemi ano maneni anunga aliba tsükong lenmangji tarutsü nung inyaka aotsü tebilemba lir ta metetdaksü.

NSS Officers tem Mid - Career Training agiogo



NSS Officers tem Mid - Career Training agiba mapang tangokba noksa angur.

Dimapur, Monupii/May 9 (TYO): Nagaland Secretariat Service (NSS) Officers tem Mid-Career Training shibangba sentong May 8 nü Administrative Training Institute, Kohima nung agiogo. Iba sentong nung Additional Chief Secretary & APC and Director General ATI V. Shashank Shekhar, IAS alakteta jaoker liasü.

Training ya April 27 nungi May 8 nü tashi agiogo, kong Junior Section Officers metsürasemi (23) kanga takok ngua shilem agiogo. Training nung shilem agiba tajangshiba indang jembiba mapang Officer Trainee temi iba training sentong ajanga peisasa dak tali

temulung lemteta tejakleni aotsü aser mapang tajungba inyaksü atema ajungmsogo, ta ashi.

Sentong nung o jembiba mapang alakteta jaoker V. Shashank Shekhar IAS-i, training ya koda tongtibang indang indang lemsatepba den officer trainee tem dang angazüksü ya tanen maka ta ashi. Paisa, sorkar inyakyimtem kodang kanga junga inyaksangshia odir iba ajanga lokti kanga ajangzüker ta ashi.

Maneni pai, Nagaland Secretariat Service ya secretariat nung tongtirit lir aser iba yagi sorkar inyakyim nung tongtibang shilem agir, aser lokti-i officer tem nem khuret tulu nonglokja lir, ta ashi.

Alakteta jaokerisa, officer tem dang ochi mashi inyakyim, tejak repranga inyaksangshiba nungi pila alitsü aser mapa inyakba tesem nung mapang shitak nung mapa takok ngua inyaksü ayongzüka liasü. Paisa, "anema alibaji rongsen" ta asüba shin o lemsatepa ajak ajungshi.

Training shibangba sentong ya Peter Konyak, Lecturer lenisüba nung agi. Training indang osang tongmelang agi Deputy Secretary aser Course Co-ordinator Asalie Lese-i agüja liasü.

Sentong nungsa N. Moa Longkumer (Joint Director), Kaholi Sema (Joint Director), aser Imlibenla Jamir (Deputy Director) nungeri shilem agi.

Chakhesang Students Union Guwahati küm 25 ajungba benjung amung



NEZCC Shilpgram nung Honibarnü CSUG silver jubilee amungba mapang Kudecho Khamo, Neichute Doulo aser tangartem tangokba noksa nung angur.

Dimapur, Monupii/May 9 (TYO): Nagaland Advisor for Civil Administration Works Division (CAWD) and Taxes, Kudecho Khamo-i, Honibarnü kaketshirtem aser lanurtem dang ochishia aser tasü ita tebandang maliba, yimjung nung aliba aser tejakleni renloka aoba lokti ka yangertsü atema teyari agütsütsü ayongzüka liasü.

Chakhesang Students Union Guwahati (CSUG) amenoker küm 25 ajungba benjungmung nung o jembiba mapang Khamo-i iba olen ya lemsatepa liasü. Iba sentong ya NEZCC Shilpgram, Panjabari, Guwahati nung agiogo.

Sentong nung o jembiba mapang Khamo-i CSUG dang silver jubilee ya Tsüngrem nem tenüngsang agüja aser iba lokti tentet tentetba nükjidong aser nukla lepa reprangshia amungtsü ayongzüker. Paisa, züngsemtem dang telungjem, ochishia masetsi-i inyaksangshitsü aser tazüokba nung alitsü atema bendanga agütsüshitsü aser iba lokti tentet indang tamendakdak aser tangatetba maneni ajungkettsü ajungshi.

Maneni pai mezümpur aser iba lokti tentet indang taoba mapang lenirtemi, telungjem, yimjung aser tejakleni aotsü atema pei taküm tenla agüja bendanga inyakba atema

parnok nem tenüngsang agütsü.

Jubilee omen "Rooted in our shared Unity and Strive beyond Academic Excellence," nung ajemdaker jembiba mapang Khamo-i kaketshirtem dang pei jurila nükjidongtem dak alia ano lokti tajungba ka yangertsü aser tejakleni anir aotsü ajungmesoa liasü.

Alima kanga toktepa renloka aoba indang jembiba mapang, shisaluyim, mapa bushiba, aluyimba aser entrepreneurship amala luyim ajak atema bendanga agüja nendak nendaka aser aremzüka meranga inyakba nübu akhanger, ta pai ashi.

Pai, kaketshirtem dang parnoki shiba luyim ya kanga süokiia agütsü ajungshiba den pei mapa takok ngua minyaktetra academic degree temji kecha nüngdak mali, ta shisem.

Khamo-isa, Laishiba ya taküm asoshi tamendakdak asütsüla, sarasadem ya pei tashi asütsüla ta ashi. Lanurtemi tetsükdaktsü balala ajangshiba indang jembiba mapang pai, tanü lanurtem tatasaba mali akümbe den tezüdang agi sünga kümogo, ta ashi.

Sütöksünem aser internet aser social media dak tali metalokba ajanga peisasa shidanga anagzüksü mekoki kümdakar aser tanur asidang nungi phone amshiba ajanga

emotional, psychological aser mental stability dak kongshir. ta Advisor yagi ashi.

Paisa, asen maitsü aser sobaliba wazüka ayutsü koda tongtibang iba indang lemsatepba den, sobaliba ken, tsüngsang aser sobosolemsü kija ya sobaliba masü saka asen tebilemba, yimyayimpong, tamangba ajak iba dak sendaka lir, ta ashi.

Lokti nem teyari agütsütsü atema renemer arutsü ajungshia Khamo-i parnok dang pei kidang, yimstüng, Arogo, riju aser rongsenketzung nung temelenshi bener arutsü kaka akümstü ayongzüka liasü.

Guwahati ya Northeast nung tongtibang yimti rongnung ka lir ta shia, Khamo-i Chakhesang nunger, Naga nunger aser Khrista dak amanger kaka ama, kaketshirtem dang yimti-i agütsüba maongkatem agütsü, tetoktepba balala atema renemtsü aser entrepreneurship atema lenmang bushitsü ajungshi.

Sentong nung Entrepreneurs Associates CEO Neichute Doulo tongti o jembir liasü.

Maneni sentong nungsa Chakhesang Students Union nungi Povocho Soho aser Naga Students' Union Guwahati nungeri salem osang lemsatep aser tir o Mulezo Dzudo-i jembia liasü.

Kohima SP Office nung Mother's Day Workshop agi



Dimapur, Monupii/May 9 (TYO): Tetsütem anogo nüngdem nung May 7 nü Superintendent of Police, Kohima Office nung Mother's Day Workshop ka ayongzüka agiogo.

Iba Workshop ya "Mother is the Foundation of a Happy Family" omen nung ajemdaker agi, kong Women Police Station, North aser South Traffic Control, aser SP Office nungi tetsür sepa 60 shi-i shilem agia liasü.

Sentong nung Brahma Kumaris Rajyoga Meditation Centre, Kohima Director Sister Rupa tongti o jembir liasü. Lai, kibong ka yimjung aser tesunep nung alitsü atema tetsütem indang shilem indang lemsatep.

Sister Rupa-i, tetsü ka yimyayimpong aser inyakyim agi kibong ajunga dak kongshir aser tetsü ka pela aliba, yimyayimpong azüokteta aliba ajanga kibong nem tashi agütsür aser pela toktsür, ta ashi.

Laisa, mapa balala aser talisa police amala takhangba aika aliba luyim nung inyakba tetsü ka ama peisasa pei anepalutsü, emotional well-being, aser positive thinking ya koda tongtibang iba indang lemsatep.

Workshop nung shilem ka ama sentong nung shilem agirtem ya tetsü ka shilem aser

kibong sasünema toktsütsü atema tongtibang onüktem sensaksemtsü asoshi telok pongu küma lemsa liasü.

Sensaksem onük ya tetsütem atema mental self-care practices, mapa aser jurila taküm liromedem aser anogoshia yimyayimpong tem dak rangloker shima sensaksema liasü. Sensaksem mapang tatishitsü aketba aser anogoshia inyakyim nung bentshia aotsü yimyatem angazük aser sentong nung shilem agirtemi iba session ajanga parnok kanga ajungmesoba aser ajangzükerba lemsatepa liasü.

Sentong nungsa SP, Kohima-i, sentong tajung ayongzükerba atema tenüngsang agütsüba den pai taoba mapang Rupa-i o jembiba angaba indang lemsatep aser lai jembiba o tem ajanga ajak kanga ajungmesor aser temelenshi adoker ta ashi.

Paisa, police personnel tem atema iba amala sentong tajung ayongzüka katsüba atema kanga pelaba lemsatepba den, tarutsü nung tetsür aser teburtem ajak atema mental well-being sessions timba agütsü kanga nüngdaker ta ashi.

Workshop tatemi tetezü tajung aketba osang ajenoker badge tem lemsü.



Ungma yim kübok Aolijen mepu nung nüburtemi kanga dang nüngdakba 'Aolijen Semtu Semtu' tajung ka 9th May 2026 nü Wb. Satemchuba Imsong Tatar, Chairman, Aolijen Ward Development Committee ajanga lapoktsüdang tangokba noksa nung angur. Pastor Rev. Mokok ajanga iba semtu meshitetsü. Nübur nüngdak reprangteta Nagaland Legislative Assembly (NLA) Speaker, Sharingain Longkumer-i tenla tulu agüja iba semtu yanglutsüba asoshi Aolijen Ward Development Committee ajanga tetenlar kibong dang pelaba metetdaksü. Ungma, 9th May, 2026

Suwendu Adhikari-i Bengal Chief Minister tenangzükba agiogo



May 09, 2026 nü Kolkata nung aliba Brigade Parade Grounds nung West Bengal Angh, R. N Ravi-i ketdangsüa Suwendu Adhikari nem Chief Minister tenangzükba agidaksüdüng tangokba noksa nung angur.

Kolkata, Monupii/May 09 (Agencies): Honibarnü Suwendu Adhikari-i West Bengal nung Chief Minister tenangzükba agiogo; Bengal nung BJP nungi mezüing chief minister ji pa asütsü.

Kolkata nung aliba Brigade Parade Grounds nung state Angh, R. N Ravi-i ketdangsüa Suwendu nem tenangzükba agidakja liasü.

Tenangzükba agiba sentong nungji Ato kilonser Narendra Modi den Union Minister tem-Amit Shah, Rajnath Singh, JP Nadda aser Dharmendra Pradhan nunger, Tripura chief minister Manik Saha, Assam chief minister Himanta Biswa Sarma, Delhi chief minister Rekha Gupta aser Uttarakhnd chief minister Pushkar Dhami nunger aden.

Tawa West Bengal assembly election nung BJP-i menden 207 tashi nung takok nguteta liasü. Trinamool Congress-i menden 80 dang angu.

Linük nüchiso anguba sülen tang mezüing West Bengal nung

voters shilem teimbai vote agütsü. Election mezüingbuba shilem nung voters shilem 93.11-i vote agütsü aser tanabuba shilem nung voters shilem 91.66-i vote agütsü.

Iba dak alia Honibarnü minister tenangzükba agirtem parnok pongu- Dilip Ghosh, Agnimitra Paul, Ashok Kirtania, Kshudiram Tudu aser Nisith Pramanik nunger liasü.

Dilip Ghosh ya BJP lenir ka aser taoba mapang Bengal BJP Tir inyaka liasü. 2014 küm sülen Bengal nung BJP tera-ayangba nung pai tongti shilem agia liasü. Pa Medinipur constituency nungi Lok Sabha MP-a inyakogo.

Agnimitra Paul ya West Bengal nung BJP sorkar mezüingbuba cabinet nung mezüingbuba tetsürji la asütsü. Agnimitra Paul-i Asansol Dakshin menden nungi tang agi tanabenbuba takok nguogo. La Bengal BJP tatong Tir lir. Tawa election nung lai TMC candidate, Tapas Banerjee madak vote tali 40,000 agi takok ngua liasü.

La yimtenren nung majemokdang Kolkata fashion industry nung nungtuugu ka liasü aser la indang label "Inga"-i Sridevi aser Hema Malini nunger ama actors nem süoshi design sütsü.

Ashok Kirtania ya North 24 Parganas district kübok Bangaon Uttar nungi BJP MLA lir. Pa tamalen business inyaker ka liasü.

Kshudiram Tudu ya Bankura district kübok Ranibandh nungi MLA lir. West Bengal nung tribal nisungtem ayongdenba nung pai tongti shilem agia liasü.

Nisith Pramanik ya North Bengal nung lanur lenirtem rongnung tongti ka lir. Mezüingbo pa Trinamool Congress nung liasü saka 2019 küm pa BJP nung aden. Modi sorkar kübok 2021 küm July ita nung pa Minister of state for home affairs aser minister of state for youth affairs & sports inyaka liasü.

West Bengal nung Council of ministers teimba agi 44 alitsü, anungji ano minister 39 shimtsü.

Lt. General N S Raja Subramani, Chief of Defence Staff shim

New Delhi, May 09 (Agencies): Honibarnü Centre sorkari Lieutenant General, N S Raja Subramani (Retd.) Chief of Defence Staff (CDS) shim aser Vice Admiral, Krishna Swaminathan Chief of Naval Staff shimogo.

Tang teinyakdak CDS, General Anil Chauhan kümsük May 30, 2026 nü tembangtsü,

iba sülen NS Raja-i office mapa agizüktsü.

Lt Gen Raja Subramani ya yaküm September 1 anogo nungi National Security Council Secretariat nung Military Adviser inyaker. Tamalen pa (July 1, 2024 nungi July 31, 2025 tashi) Vice Chief of the Army Staff inyaka liasü aser 2023 küm March ita nungi 2024 küm June

ita tashi Central Command nung General Officer Commanding-in-Chief inyaka liasü.

Ano külen Vice Admiral Krishna Swaminathan ya tang Mumbai nung Western Naval Commander teinyakdak. May 31 nü pai Navy Chief mapa agizüktsü aser pa kümsük 2028 küm December 31 tashi alitsü.



May 09, 2026 nü Kolkata nung BJP sorkar tenangzükba agiba sentong nung Union Minister, Amit Shah-i taoba mapang actor aser BJP lenir, Mithun Chakraborty ajurua jembidang tangokba noksa nung angur. Kasa noksa nung Defence Minister Rajnath Singh aser BJP National Tir, Nitin Nabin nata angur.

Kerala CM shimtsü atema Congress-i tang tashi telemtetba magiteter

New Delhi, May 09 (Agencies): Tawa Kerala assembly election nung Congress-i takok anguba sülen anogo aika süir, ajisüaka tang tashi Congress-i Chief Minister meshimteteter.

Kerala Congress Tir, Sunny Joseph-i, Congress National Tir Mallikarjun Kharge'er kidang senden ka ayongzükogo aser iba senden nungji Chief Minister menden atema telemtetba agitsü, ta metetdaksü.

Osangbenertem den jembidang pai, "AICC Tir ajurutsü atema ni aoer. Ni Kharge'er kidangi aoer. Yangji o lemteptsü aser telemtetba agibaji bangdak lenirtemi metetdaksütsü," ta ashi.

Tawa Kerala assembly election nung Congress-i aniba UDF-i takok ngua liasü.

Kerala nung Congress legislature party-i Chief Minister shimtsü atema party bangdak lenirtem nem tashi agütsüogo.

Kerala Congress lenir aser Thodupuzha nungi MLA, Apu John Joseph-i, Chief Minister shimba sülen ministerial portfolios atema telemtetba agitsü, ta metetdaksü.

Ano külen Congress lenir

tain, PJ Kurien-i, Congress-i by elections densema yimtenren tensa ajak azüoktettsü, ta metetdaksü.

Congress-i AICC general secretary/Alappuzha MP K.C. Venugopal, assembly nung Opposition lenir, V.D. Satheesan aser Congress working committee lenir Ramesh Chennithala nunger rongnung ka CM shimtsüa akok.

Venugopal teloki, MLA 52, Congress MP aser state nung lenir tain 14-i parnok pusemer ta metetdaksüogo.

Congress-i aniba UDF teloktep nung dena aliba Indian Union Muslim League (IUML)-i menden 22 nung takok ngua liasü aser parnoki CM menden atema Satheesan pusemer.

Ano külen Chennithala-ia pa tambuti, anungji pa nem chief minister menden agütsütsüla, ta ashir.

Tang tashi Chief Minister menden atema telemtetba magitetba atema Congress aija CPI(M) state secretary, M V Govindan-ibo, tang tashi Chief Minister menden atema telemtetba magitetba ajanga party telung nung mangatettep aliba sayur, ta ashi.

Tanü Vijay-i Tamil Nadu Chief Minister tenangzükba agitsü



May 09, 2026 nü Chennai nung TVK tongti lenir, Vijay-i Tamil Nadu Angh, RV Arlekar ajurudang tangokba noksa nung angur.

Chennai, May 09 (Agencies): Honibarnüa TVK tongti lenir Vijay-i Tamil Nadu Angh, RV Arlekar ajuruogo; tetsüiba anogo ishika tsüingda Vijay-i tang agi pezübenbuba Angh ajuru.

Honibar nikongdang Vijay-i MLA 120-i pusemba 'letters of support' RV Arlekar nem agütsü aser TVK-i May 10 nü sorkar tenangzükba agitsü atema metetdaksüogo.

Viduthalai Chiruthaigal Katchi (VCK) aser Indian Union Muslim League (IUML) natia sorkar akümtsü atema Tamilaga Vettri Kazhagam (TVK) yaritsü, ta metetdaksüba sülen sorkar akümtsü atema simple majority (menden 118) abensaogo.

VCK Tir, Thol Thirumavalavan-i, "Iba telemtetba (TVK yaritsü) ya agiogo, kechiyong TVK leniri Vijay-i sorkar akümtsü atema inyaksangshiba nung VCK ya tetsükdaksü ka

mekümdaksütsü, iba denji külemi onoki President's Rule mebenokdaksüner. Sorkar akümtsü atema dang onok (TVK) yarir, aser iba nungji telatetba kecha mali. Vijay-i onok dang pa yagi arutsü ta ashi, ajisüaka ni pa dang sorkar tenangzükba agiba sülen asenok ajuruteptetsü ta shiogo. Onoki iba osangji DMK Tir M.K. Stalin nem-a metetdaksüogo," ta metetdaksü.

Bodhbarnü aser Brihostibarnüa Vijay-i Arlekar ajurua sorkar akümtsü atema TVK jaoktsü asoshi mepishia liasü. Ajisüaka sorkar akümtsüa menden peria mali, ta shia Angh-i magizük.

Ano külen tanga osang ka nung, AIADMK tsüingda mangatettep adokogo. AIADMK nung lenir tain CV Shanmugam-i party ana küma lemsatsü atema asalentong yanglur.

Osang angazükba agi, AIADMK MLA 30-i Shanmugan pusemdar.



TIR YIMYIM YIMOBILEM (EDITRIAL)

DIMAPUR SUNDAY, MAY (MONUPII) 10, 2026

Ojala kong lir ?

Tanü ya alima ajunga nung Ojalatem anogo lir. Iba anogo yabo tanga benjongbentsü amongba anogotem dang nungi balaka, kechiyong iba anogo yabo tamangba yimsü aser alima kin ajak nung nisung ajaki amongtsüba anogo ka lir. Alima nung nisung shinga tetsübok majangiang maru. Aji oda, nisung ka atema tetsü temeimjibo pa mesüra la masodangyongi tetsü tebok nungi tenzüker. Atangji, Oja ta ajatsüba ya tetsür ka asoshi maongka tulu saka ano timtem-khureta tulu lir. Ojala asoshibo tanur ka sozüka yutsüba timtem tatembang masü saka tetenzüker, kechiyong iba tanur jagi nisung akümtsüla aser iba shisaboluji teti ojala mulungjang nung lir. Obalai ki tajung yanglutsü akok saka iba kidang kibong tajung ka yangertetsüba khuretji ojala dak tuluka keta lir. Kidang abensüoshi peria makatsüa akok saka ojalai temeimi tanurtem ajak lemlema abendaktsür, kidang chiyongtsü peria makatsüa akok saka ojala temeimi tanur ajak tebok sünga chiyongdaktsür, kidang timtem touthi alitsüa akok saka item timtem tia ajakji ojala temeim aser taremsük agi akoker. Aji oda, tetsütem anogo ya alima nung takok anguba tetsütem nem tenüngsang agütsüba aser parnok temeim bilemtetba anogo lir. Iba anogo nung nisung ajaki pei temeim tetsü bushir. Atangji, alima yimya asünungji tetsütem aika iba lima nungi pilar alitsü mesüra tetsütem aika pei jala-jabasotem ajak bendanglen sükshia omar, yimtak pei kija rongjenseta alitsüa akok. Ajisüaka, tetsü ka temeimji chirnurtem ajak mulungjang nung bilemteter. Alima nung nisung ajak kasa masü, karbo jangratema alir saka ano tetsütem aika makamait aser shisabolu khuret tapu balala agi nenneter alitsüa akok. Aji oda, koba jenjang nung lidir liaka tetsü ka mulungjang nung teti khuret lir. Iba khuret jagi jala jabasotem dang masü saka kinüngbo dena alima nung nisung tajung kümdaktsür aser kotak tonga anir aor. Tanü anogo ya chirnurtemi item ama tetsütem bushiba anogo lir. Atangji, tetsütem taküm aika bushiaka iba lima nungbo mangutsüsa akümlü nung pilaogo saka item tetsütemjia dena pei chirnurtem mulungjang nung angur. Tanü ama ojala meim bilemtet dang aser ojala kong lir ta bushidang, Laishiba nung aliba tetsü tajung aika bilemteter. Item Tsüngremi moatsüba tetsütem rongnung Samson tetsü, Samuel tetsü aser Mosa tetsü nungertem bilemteter. Samson tetsü dang Tsüngremi Samson tebok nung abenba mapang temesepba aser memerükba chiyongtsü kecha machitsü ashi aser yamaji lai aremsüka la temang merükteta la nu menden nung alima nung ajak dang nungi tashitaitiba nisung Samson aben. Aji oda, Hannai la temulung raksaa jepa Tsüngrem dang sarasadem aser Tsüngremi la nem Samuel moatsü aser lai Tsüngrem dang nangzükba ama lai Samuel Tsüngrem mapa nung amshitsü atema bendanga agütsü. Alima otsü nung pei nübortem tangar bendanger yimli kübok alarsa aliba tia nungi anitetba walunirji Mosa lir. Mosa yabo taso nü tepseta endoktsü asoshi Ijip chuba Faraoi ozüng agüjadoker liasüba tia nungi tetsü shisa akaba ajanga kümsükba nisung ka liasü. Ibaji dang masü saka Mosa ya ita asem asü dang nungi Farao chubaer semchir ama kümer chuba kidang inet. Mosa tetsü pa mesüdaktsü kümsükba dang masü saka pa ina atudang paji Ijip nung masü saka Ibri nung lir ta tangatetba agütsü. Aji oda, Mosa asoshi Ijip chuba-er kinünger asütsüba dang nungibo Israel nung alartem nem nüjiso agütsüsbajiang pa khuret aküm. Item jabasotem ajakji tasüngtet, taremsük, shisataka aser Tsüngremi metetba tetsütem nu menden nung abenba tanurtem liasü. Tanü asen lima nung Samson tetsü ama machimajemtsü nungi pilar pei taküm aser temang meshiteta aliba tetsütem aika lir, Samuel tetsü ama Tsüngremi ma ta meshitetsüsa sarasadamba tetsütem aika lir aser Mosa tetsü ama pei chirnurtem dang masükümi ajemalua pei nübortem dang meimtsü tangatetba tajung agütsütetba tetsütem aika lir. Tanü tetsütem anogo nung ojalatem kong lir ta bushidang, item tetsü tajungtem ngua Tsüngrem nem tenüngsang agütsür. Tsüngremi ano ojalatem moajangma !

OLEMSABANG

"TAOCHI TZÜPOKDAK OJALA"

~ L. Kika Pongener

Ojala-tem ajak dang...

" Ojala-tem anogo tepela salem " metetdaksür.

Alima nung tetsür meyangu asübo alima ya kechi koma ka sula (?) ta aiben shisadanger. Alima nung tetsür ya mali asübo alima ya tobur kanga majung, telinutsü maket aser azüngmeyakdak tesem ka sula. Alima nung tetsür aliba agi alima ya tobur junga azüdaktsür, lemle-lemle-a kümdaktsür aser teronem lidaktsür. Ano aji tang masü, tetsür ya tebur atema alima shi nung, tanela nung, aser shisatsü nung 'teyarir tetemsu' asütsü yanglu. Tsüngremi tetsür yanglubaji iba nukjidong nungji yanglu. "Kibuba Tsüngremi ashi, nisungji kija alitsü majung; ni pa asoshi 'teyarir tetemsu' ka yangludi" (Lipok-2:18). Anungji tetsür ajaki na tetsür ka sudaktsüba atema Tsüngrem tenung kanga asangtsüla. Tetsü-tem ajaki ne dang chirnurtemi 'Oja' ta ajatsüsa... Na ' Tetsü' (Mother) ka sudaktsüba atema Tsüngrem tenung asangtsüla; kechiyong 'Oja' ta ajaba nungja ya maongka ulura lir.

Taküm 2026 ABAM küpok lim arogo ajak nung 'Ojala-tem anogo' (Mother's Day) 'Omen'-ji "Taochi Tzüpokdak Ojala" ...ta agüja lir..."Tzüpokdak" ya tzü pokteta ayimdak tesem dang ajar. Tsünglu arudang dang apokba; mesura Tzüpo nung tzü atsünga alidang dang apokba masü; saka tsünglu aruba mapang nunga aser tsüngsarusa mapang nunga; mapang ajak nung tzü pokteta adoka yima aliba dang 'Tzüpokdak' ta ajar. Tanü onuk jagi shinubaji...Ojala-ji iba tzüpokdakji mesuka....Mapang ajak nung; la dak nungi taochi aser temeim tzülok ama pokteta atoker. La pela-a alidang dang; iba taochi aser temeim-ji pokteta atoker aser alir; saka jashia alidangpo; iba taochi aser temeimji pokteta matoker aser malir ta masü....Ojala dak tensa tia ajak nung iba taochi aser temeim jagi sunga alir. Ojalai teti la tebang nungi taochi aser temeim o jembir aser la mulungjang nungi mapang ajak nung taochi aser temeim tzülok ama pokteta ayimer. Ojala dak taremsük jakla agi sunga lir...La kinungpui la dang mejungi benshi-aka lai aremsüker. Lar chirnuri la anema aibelen-aka; aibelenbaji mesukshi-i lai odang aremsüker. Anungji obalatem aser chirnur ajaki tanü ojala-tem nem akümtsübu aser tetushi agütsüdi; kechiyong aji ojala dak alangba senpet lir.

Ijip lima nung Farao chuba tendak; Ibri nung tebur asoba ajak tepsettsü ozüng agütsü; iba ama tensa ka nung; Mosa tetsü-i Mosa sor ita asem tashi miima ayubaji tesungmangtsü ka lir. Ijip lima nung Farao chuba ozüng agi Ibri nung tebur asoba ajak tepsetba amaji....Tanü putu nung Alcohol, Drugs aser HIV & AIDS, agi lanur aso-ajen tobur tajung, sempet tajung, Degree tulu zünger aika tepsetogo aser tepsetdagi. Ano 'Science and Technology advance' mapatem....Smart Phone, Mass Media, Artificial Intillegence (AI) etc...item ya timyimi mamshiba ajanga; ano noksa tamajung (Porno Video) repringba, Games tapu balala asayaba...Item mapatem yagi asen chirnur aika tokolok shisatsü (Mental) aser tanela jenjang (Spiritual life) moksepdaktsüdag. Ano tanü putu nung tetsübotsü tulutibaji LGBTQ+ yagi lanurtem nepeta arishidagi. Mekümdangra, asüng iba LGBTQ+ yagi arogo aser mung dang nung tebilemtsü khuret agütsütsü. Tanü lanur aika item lar kümer taküm raksadagi. Iba tia nungi sala-a anitetsü asoshi tsüraburtem khuret tulu lir; talisa, ojala-tem khuret tulu lir. Aji oda, modern technology mapatem-ji metettsü kanga tongtipang; saka iba lar (Slave) makümtsüla aser iba nemji manisadaktsütsüla. Tanü asen chirnurtem item tatidang sang nungi kümsüktsü asoshi; Mosa tetsüi 'Tzütok Molok' ka tak-a renemer....Iba Molok nungji Mosa inoker; Nile ayong nung Farao jala teti tzü chigodak tesem nung yutsüba ama....Tanü putu nunga Ojala-tem ajaki pei chirnur kümsüktsü asoshi 'Tamang Molok' renemtsüla..."Sarasadem Tesep" akatsüla. Kipok tekülem nung Tsüngrem o nendak-nendaka ashitsüla, chirnur atema teti lumia sarasadem nuktsü makongtsüla. Aser chirnurtemji parnok aotsüba lenmang shitak nung sayua anitetsüla...."Tanür ka pei aotsüba lenmang nungji sayutetang" (A.Shin-22:6). Ibaji ojalatem khuret asütsüla.

Anungji tanü ojala-tem ajak dang ayongzükubaji....Tanü alima putu tensa kanga majung; asen chirnurtem 'modern technology' agi bener aruba sangra-sangji mapatem....Smart Phone, Mass Media, Artificial Intelligent (AI), ano LGBDQ+, Alcohol & Drugs, HIV & AIDS; aser lokti temenen (Social Evils) den tongpang rara nung nokdaka lir. Tanü asen chirnurtem item lar kümer aliba nungi manitetra; aruya-a aliba putu (next generation)-ji tetsübotsü putu ka asütsü. Anungji ojalatem ajak Mosa tetsü ama tamang-tir ka-ka asütsü tanü putui akanger. Ojalatem ajak chirnur kümsüktsü asoshi 'Tamang Molok'...'Sarasadem Tesep' akatsüla. Ijip-tsür nuso yarirtemi (Nurse) Farao dang; Ibri-tsür indang tongtipang o ka shia lir..."Ibri-tsürbo Ijip-tsür ama masü parnok jerat-perar; nuso yarir marudang benteter alir" (Anitet-1:19). Yamaji ojala-tem ajak jeret-perar, aser tamang-tir ka-ka asütsüla....Chirnur asoshi teti nuktsü mekongi sarasadamba tetsü ka-ka asütsü ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Khristan lenir 300-i US Congress dang Israel meyaritsü mepishir



May 07, 2026 nü Khristan organisations balala nungi lenirtem Washington D C nung aliba Capitol Hill nung adenshia joko Israel meyaritsü atema takhangba agütsüdang tangokba noksa nung angur.

May 09, 2026: US nung Khristan lenir 300 dak temai US Congress dang Israel yariba anenang aser Gaza nung timtemertem nem teyari agütsütsü atema melaang, ta takhangba agütsü.

New York, California, New Jersey, Virginia aser Maryland densema US nung aliba state balala nungi Khristan lenirtem aikati iba campaign nung shilem agia Israel sepaitemi Palestine nunger anema inyakba atema tebilemstü akaba lemsatop.

Brihostibarnü Khristan organisations-a aikati Washington D C nung aliba Capitol Hill nung adenshia joko US-i Israel nem fund magütsütsüla, ta takhangba agütsü.

Khristan lenirtemi US Congress züngsemtem dang, Israel nem teyari agütsütsü melenbo occupied East Jerusalem aser Gaza nung hospitals sütsütsüla; iba denji külemi UN Relief and Works Agency for Palestinian

Refugees (UNRWA) asentenshir tenzükang, ta takhangba agütsü.

Tan hopta Arogo nung lenirtema aikati Congress züngsemtem ajurua Gaza aser West Bank nung Palestine nungertem timtemba tebilemstü lemsatopogo.

Khristan lenirtemisa Gaza nung tanurtem densema shirangertem atema medical service junga maliba aser yaküm October nung ceasefire tezüngzüktep agia liaka Israel-i anogo shia Gaza nung nisung tepsetba metetdaksü.

Osangbenertem senden ka nung Franciscan Action Network nung züngsem, Eli McCarthy-i, Israel nem agütsüba raraba hadirtemji Gaza aser Lebanon nung tai maket nisungtem tepsettsü atema amshir, ta metetdaksü.

McCarthy-isa, "East Jerusalem hospital network atema teyari agütsütsü, Gaza nung timtemba nürburtem yaritsü atema temelaba agütsütsü,

UNRWA asentenshir tenzüktsü aser Israel nem raraba hadir aser bomb magütsütsü atema onoki akhanger," ta metetdaksü.

Brihostibarnü longkak aitba sentong nungji New York nung aliba Riverside Arogo nungi Rev. Mira Solan-i, Gaza nung tanurtem tepsetba ya taaktsü mapa lir, ta ashi.

"Gaza nung tanur shilem 80-ibo medical teyari mangur, aser Gaza Strip nung kibongtem shilem 50-i health service mangur. Ibayongji tanurtem aika asür," ta lai ashi.

Greek Orthodox nun, Agapia Stephanopoulos-i, occupied East Jerusalem nung Israel-i Muslim nungertem aser Khristantem anema inyakba ya 'mezülongi nisung jenti tepsetba' ta ashitsü akok, ta metetdaksü.

Laisa, "Tangbo Khristantemi Temeshi Lima toktsür oadoker, kechiyong parnoki timtem kanga ajangshir aser Khristan jilatem nung bendangertemi Khristantem meyong ali-kiojen rakzüker," ta metetdaksü.

Colombia nung Khristantemi pastor tem kümzüktsü mepishir

May 09, 2026: Tawa Colombia nung nung prangpong amer telok balalai Khristan lenirtem puer aoba aser tepsetba tatalokba aika aliba nung ajemdaker linük nung pastor tem aser Khristan lenirtem kümzüktsü atema campaign ka tenzükogo.

Iba campaign ya Decrees 1066 aser National Protection System (NPS) nung ajemdaker tenzük. 2023 küm sorkari yimsü lenirtem aika security list nungi agiena liasü, iba sülenbo parnok nem special security magütsür.

Khristan melungtet telok, Christian Solidarity Worldwide (CSW)-i iba campaign tenzükogo.

CSW-i, 2024 küm December ita nungi tenzük tang tashi nung Khristan lenirtem tepsetba, samaba

mesüra puer aoba tatalokba 11 lir, ta metetdaksü.

Küm Tasen sentong nung nisung kari Pastor José Otoniel Ortega-a khaseta liasü. Ano tatalokba ka nung Khristan lenirtem aser lokti lenirtem 8 tasü mang tesem ka nung külemi rema aliba nguteta liasü.

Colombian prosecutor office-i, Khristan lenirtem aser lokti lenirtemji Frente Armando Ríos teloki tepset, ta metetdaksü. Iba telok ya FARC nungi razüka aoba telok lir.

Iba telok jagi tetsür ana aser tebur trok senden kati jaoka liasü, ajisüaka parnok samaba sülen mapang talangka lir ang tasü mangtemji angu.

CSW-i ayongzükba campaign kübok Tir election nung takok angusang nem temepishiba shidi ka

agütsütsü. Tir election ya May 31, 2026 nü agitsü.

CSW Director of Advocacy aser Americas Team Leader, Anna Lee Stangl-i, "Tesüiba küm ana tsüngda Colombia nung akhi tensa tu meyipa aruogo," ta metetdaksü.

"Yimsü lenirtemi yimjung, ochi temeden aser temeden atema ola adoker, ibayongji ozüng alema tentetba teloktem aser ozüng alema inyakertemi yimsü lenirtem anema inyaker aser linük tesem ajaklen tetsübu proker," ta laisa metetdaksü.

"Colombia Tir election nung shibai takok ngudir nguaka yimjung atema inyaksüla aser yimsü lenirtem nem tanaben sorkari tekümzükba agütsütsüla," ta lai metetdaksü.

ANO GO ABEN TSÜNGREM DEN

KÜ DANG AOCHIANG, O TSÜNGREM!

"Kü dang aochiang, o Tsüngrem kü dang aochiang: Kechiyong kü taküm ne dak jenoker..." T.Ken 57:1.

Asenoki kechiba tsübur, kechiba tashi mangar, kechiba Pai sayuba lenmang nung meliteter? Aser kechiba Pa ochiba lenmang nung mejajateter? Asen taküm ya reprangdangra ya, Tsüngrem taochi agi Pa mesükba nung yanglua toktsüba taküm ka lir, süra tanü asen Tsüngrem tsüngdang aseni koma alir aser liteta sayur? T.Ken züluri iba ken nung ya ashir, Tsüngremer taochi pa dang kuli sayuba mapa ya tesangmangtsü ka lir. Kechiaser, pa lendong nungi kümzükba, tsükchir ket nungi kümzükba, aser alima wara nungi kümzükba kuli ka lir.

Tsüngremer taochi ya tesüngmangtsü toachi ta asenoki anagateter, kechiba süra asen taküm nungi tenzük asen libaliru ajak nung Pai moaja len anir, saka iba temoatsü ya mashi nisungi magitettsü, shirnoki Tsüngrem tsübur, angateter, tashi angar, aser ochiba nung alir parnok nem ang iba taochi maongka ya agütsür. T.Ken zulusangi ashir; "Ni kotak nungi yoktsü aser ni kümzüktsü" Tsüngremi pa yimlibilem taochi sayubaji ya. Tanü asenoki asen Tsüngrem tsüngdang kechi ashitsü?

Arung, aseni Tsüngrem dang akümtsüba langzüsübaji; "O Tsüngrem, anüng temalen na ajungketang; Ne sentsüwangshi ali ajak madak lidakjang". "Kü mulungjang marakzüi lir, oh Tsüngrem, Kü mulungjang marakzüi lir" Ni ken tendi, au ni nüngsang ken tendi... Anogoshia asen taküm asoshi tenüngsang agütsütsüla aser asen Tsüngremji tushitsüla.

SARASADEM

Oh Tsüngrem, Tanü tashi ne taochi manung onok aitetba, sayuba asoshi ne nem tenüngsang agütsür. Amen.

OJALA TAMANGJI KODA TULU

~ *Thriocy Stm, Mokokchung*

Zübuji kanga tulubo masü, saka memeteti
'Oja' ta jaadok, Ojalai ilonga arur
lai la teka tanep jagi kongshidang
kü dak kechi atalok item ajakji anepadok,
Ojala dak taneptsüba tashi lir ta tamang aser teyimla aka.

Tanü Ojala kü den mali, saka lai jembiba
aser inyakba kü den lir,
Ojalai abenba khuretji reprangdangra
Ojalatem aikadi mebendang alitsü südi ta bilemer,
Khuretji Ojala asoshibo naro tajung ka
ama agizüka lai anu.

Pur medemsor menepdaksününyong
taka taiter ki aika nung Ojalai tetsüng ajemokdang alitsü,
taku tasen ajak Ojalaibo tanang dang küma agizük,
Tzünglu aser Anü den rarateptsüji
la asoshi anüshi masü saka lai apenba sü kaji tang liasü.
Slipper kaji ojalaibo küm ka songdema asem.

Maka maitba asoshi Ojalai nemnemba
kodanga mangashi, saka takdang ka nung
lai la olaji tera nemzük aser Tsüngrem dang la
khuret bona sarasademba dang angashia liasü.
Ashigo Ojala ama taremzük shisatsü maka asübo
Kidang rongrong agi sünger lila ta bilemer.

Tebilemstü khuret ajurubaji Ojala asoshibo
Tsüngrem den tesendaktep tali akangashir ta
la taküm yimya nungji angatet.
Taka taiter jala jabasotem aben süoshi tajung
sobur kima yimdong nung angudang, Oja! nai miima
ne nüktzü aidok, ibaji na asoshi koda taku liasü.

Tsüngremi ne nembo shisatsü balaka agütsü
südi ta bilemer, kechiyong taküm yipru tulu den
tebilemstü khuret jendi agi semdangaka,
Oja! ne jak kodanga taret aser shimaka mungudang,
tensa ajak nung ne menürem jak dang ngu liasü.

Tanü onok akümlir ka alimar khuretem agi semdangdang,
Oja! nai khuretji naro ka ama agizüka anuba bilemteta
alimar khuret nemji onok mokokdaksüi
shisatsü tang tali kümümshidaksür.
Khuret agi semdangbaji Tsüngrem den tesendaktep
akangshir ta Oja! Ne taküm yimya ajanga tali jangjatsür.

AO OSHI ANGAZÜKDAK:

TANÜ ANGAZÜKTSÜBA OJANG



Yaok

(v) tarok nung ali enokba (shoveled)

* Lenmang tarok ajak nung onoki ali yaoka toktsü.

Yapok

(v) ali ama agi nembanga aliba lapok (scoop out)

* Aluyimertemi ali yapoker alishi temyonga ao.

OLONG PAITEP # 7499

15x15 crossword grid with numbers 1-15 indicating starting positions.

TIPIEN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. _____ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. _____ kibur - (5)
13. Tebur tembar tsüngda jatepba - (4)

OLONG PAITEP # 7499 TELANGZÜBA

TIPIEN :

- 1. Nüngtugo, 5. Labi, 6. Kasa, 7. Aso, 8. Tangar, 11. Petinu, 15. Ngd, 16. Süin, 17. Esep, 18. Tesangwa.

LANGTSÜNGLEN :

- 1. Nükshi, 2. Nashi, 3. Olong, 4. Kima, 9. Aon, 10. Ajunga, 12. Tenet, 13. Anüng, 14. Empe.

NAI-A YA METETTER



May 4, 2021 nü Halima Cissé aser Abdelkader Arby na nem tanur jakrep 9 moatsüba indang osang alima ajungalen prokshia liasü. Taküm tena tanur 9 prong arishi küm pungu jungogo aser school-i ao tenzükogo. Tena tanurtem ya "world's first surviving nonuplets" lir aser tebur pezü den tetsür pungu lir.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

New Shillong water project atema sen talila meshir



Shillong, May 9, 2026 (Agencies): Meghalaya sorkari New Shillong Township Water Supply Scheme atema Rs 772.96 crore indang revised estimate shidangogo.

Mezüngbo iba mapatong atema Rs 538.44 crore enoka liasü saka major design aser infrastructure changes ta ser sen teimba kümogo.

Iba mapatong meyipa reprangshiba sülen 43.55% teimba kümogo aser ibaji Rs 234.52 crore talila lir. Iba mapatong ajanga New Shillong Township, Mawkhanu Knowledge City aser temeket yimtsüng 32 nem potable water

agütsütsü nükjidong nung lir. Iba mapatong atema sen teimba akümbaji tzünokdang tesem melenshiba lir. Nonghali yimtsüng nung yanglutsü ta shimtetba tesem anasa landfill ka lir aser iba jagi tzünokdangji temaleni atutsüsa akümer ta sorkar ketdangsürtemi ashi.

Iba tesem melenshiba ajanga engineering design nung kongshir aser tzünokdang 70 metres nungi 165 metres akümer ta ketdangsürtemisa ashi.

Ano, sen teimba akümbaji local Dorbar Shnongs-i ali melen temenok meshiba

densema lir. Mezüngbo community/local Dorbar Shnongs nungi temenok meshiba maliasü saka tangbo parnoki meshir ta ketdangsürtemisa ashi.

Sen teimba akümba nung power supply system ka lir aser iba ya original DPR nung meinok. Meinprong kecha melii water supply atema independent power infrastructure ka nüngdaker ta parnokisa shisem.

Maneni, tang aliba PWD road kilometer 1.5 shi ka raksatsü aser pipeline enoktsü atema tusatsüsa akümstü ta ketdangsürtemisa ashi.

2018 nungi Tripura nung sorkari mapa 20,000 tema agütsüogo

Agartala, May 9, 2026 (Agencies): 2018 küm Tripura nung BJP sorkar akümba sülen nisung 20,845 nem sorkar mapa agütsüogo ta Tripura Chief Minister Manik Saha-i ashi.

"2018 nung ozü sorkar akümba sülen tanü tashi nung onoki nisung 20,845 mapa nung aniokogo aser tanü nisung 115 nem offer letters agütsür" ta pai ashi.

"Tang tashi nung contractual aser outsourcing arrangements ajanga nisung 24,078 aniokogo. Tesüiba mapang contractual basis nung inyaker aika den ni ajurutepogo aser parnok aika

competitive exams ajanga takok ngur regular service inyakdar. Talisa selection list nung tetsür aika dena lir aser iba ya osang tajung" ta CM Saha-isa ashi.

Onoki mapa tazüing aliba nung nisungtem shimoktsü mapa tenzükogo. Iba nung senotsü timtem lir kechiyong sorkar mapa inyakeritem indang itasen ya revenue expenditure kübok adener, ta paisa ashi.

Sorkari capital expenditure nunga temulung agütsür aser infrastructure o terenlok maparen nung Rs 10,000 crore shi endokogo ta Saha-isa

metetdaksü. "2014 nung kodang Narendra Modi-i Prime Minister inyaksü tenzük employability rate 33.95% liasü saka tanübo 54.81% kümogo. Anungji skill ya kanga tongtipang aser sector shia nung nübortemi pei pei skills tajungba akümstüla" ta paisa ashi.

"Sorkar mapa inyakeritemi nübortem asoshi service delivery tongtipangtiba asütsüla aser staff tasentemi nenok itasen ya public dang nungi bendenba tax nungi agütsür ta teti bilemtetsüla" ta CM Saha-isa ayongzük.

Manipur nung sepaitemi telungpur ana apu



Imphal, May 9, 2026 (Agencies): Manipur nung sepaitemi Churachandpur nung Kuki National Army-Burma (KNA-B) züngsem ka puogo.

Osang tejangja ka angazükba sülen Assam Rifles-i Zoveng tesem nung mita aodang KNA-B züngsem ka apu.

Iba nisung ya Lal Thang John ta jangjaogo aser pai taoba mapang KNA-B nung adentsü

atema Myanmar-i orr aru ta Assam Rifles-i ashi.

Iba nosung ya Myanmar nungi mima Churachandpur-i aru aser Ukhrul-Litan nung mepetmesü adokdaksütsü atema aotsüba liasü ta osang ajanga ashi.

Assam Rifles sepaitemi pa ket nung 9mm pistol ka ngutetogo aser maneni bushisüngdang südar. Maneni, sepaitemisa Imphal

West district kübok Hiyangthang area nung Kanglei Yawol Kanna Lup (KYKL) (SOREPA) züngsem ka puogo.

Iba nisung ya Huidrom Narendra Singh (38) ta jangjaogo aser pa ya Hiyanglam Waikhom Leikai nung alir.

Osang tejangja ka angazükba sülen mita aodang Huidrom apu aser pa ket nungi mobile phone ka ngutetogo.

Trump-i Russia aser Ukraine na tsüingda anogo 3 atema ceasefire benoka sangdong



Donald Trump

Washington, Monupii/May (Agencies): United States ?tir Donald Trump-i, Russia aser Ukraine na tsüingda anogo asem atema ceasefire benokba sangdongogo.

Hokolbarnü Truth Social ajanga US tir yagi ashiba agi, ceasefire ya Deobarnü nungi Honibarnü tashi benoktsü.

"Russia aser Ukraine na tsüingda anogo asem (May 9, 10 aser 11) atema ceasefire benoka pelashishia sangdonger," ta Trump-i zülutsü.

Iba osang sangdongba sülen mapang tatsüka lir Ukraine tir Volodymyr Zelenskyy-ia X ajanga, küm pezü tashi rara-a aruba tembangdaksütsü asoshi US teyongtsüia sensaksem nung shilem ka ama anogo asem atema meraratsü asoshi telemtetba agiogo, ta ashi.

Maneni Russia tir nem teyari agütsür Yuri Ushakov-ia, "US administration den telephone ajanga sensaksemba mapang iba ken o ya mulungtepogo. US nunger ketdangsürtemi Kyiv dena tongtepratepogo," ta ashi.

Pai ashiba agi, tir Vladimir Putin aser Trump na tawa sensaksemba mapang iba ken o ya mulungtepa agizükogo. Lenir ana yagi World War II mapa linük ana külem ser raraba indang jembiba den Victory Day amungba mapang ceasefire ka benoktsü atema sensaksemba liasü.

Russia-i taoba mapang May 9, Honibarnü World War II Victory anogo nüngdem nung anogo

Online gambling atema Jakarta nung bendanger 321 apu

Jakarta, Monupii/May 9 (Agencies): Tenokdangba agütsür aliba online gambling nung shilem agiba atema Indonesia police-i Honibarnü bendanger 321 puogo. Bendangertem ya timba Vietnam nungi liasü, ta ketdangsürtemi ashi.

Temulung melemi bilermertem ya Central Jakarta nung office building ka nung pua liasü. online gambling nokdangtsü atema ketdangsürtemi tang jenjang agiba mapang item bendangertem ya puogo.

Alima nung Muslim nunger timba aliba linük nung ya online ajanga gambling asüba tenokdangba agütsür lir.

Sepaitemi apurtem rongnung Vietnam nungi nisung 228, China

ana atema ceasefire benoktsü ta sangdonger liasü. Ukraine-ia, parnoki rara anena atatsü atema benokogo, saka Moscow-i sentoka toktsü, ta shir liasü.

"Ni indang indanga mepishiogo," ta Trump-i Hokolbarnü ashiba den Russia aser Ukraine tir napronglai mulunga agizükba atema kanga pelaba lemsatepogo.

"Russia nung iba benjung ya Victory Day atema lir, aser kasaji Ukraine atema-a iba anogo ya tongtibang lir, kechiyong parnoka World War II nung tongtibang shilem agir ka lir. Ceasefire mapang rara ajak anena atatsü aser linük anaprongla nungi tepuoker meyi kaka melenteptsü," ta Trump-i ashi. Zelenskyy-ia tepuokertem melenteptsüba indang osang jangjatsüogo.

Rara tembangdaksütsü atema sensaksem maneni kadar, ta Trump-i ashiba den, tenangzüktepba ka yanglutsü atema anogoshia anasabai odar, ta shisem.

"Mapang talangka azütokshia raraba temangdaksütsü atema iba ya tetenzükter asütsü ta imla atar," ta paisa shisem.

2024 küm tir atema nüboyimba mapang Ukraine nung rara anendaksütsüba ya Trump asoshi tongtibang onük ka liasü, aser iba mapang pai tir mapa agizükba sülen ghonda 24 tsüingda rara anendaksütettsü ta-a shia liasü.

Ajisüaka küm ka ser tesadang oaka Washington-i tang

nungi 57, Myaanmar nungi 13, Laos nungi 11, Thailand nungi pongu aser Cambodia nungi asem lir, ta Indonesian police force's crime investigation unit director Wira Satya Triputra-i osangbenertem den sensaksemba mapang ashi.

Temulung melemi bilermertem yagi ita ana tashi online gambling operation ka achaayanga liasü, ta Wira-i ashi.

Pai ashiba agi, police-i pua alir parnok 321 nungi 275 gambling dak sendakba nung Indonesia indang criminal code nung aibelenba atema aitsüogo aser iba aibelen atema küm tekü tashi tepuokdak ayutsü akok.

Wira-isa, bendangertem timbai parnok ya online gambling achaayangtsü atema In-

tashi iba inyakyim takok monguteti arudar, saka Putin-i rara tembangdaksütsü memulunger, kechiyong Russia military tashi apir pai iba rara ya akoktsü ta bilemer.

Tang yimjung atema sensaksem ya Ukraine anütoklen Donetsk tesem dak sendakba nung hai-haura makatetba ajanga bangdaka lir, koba asemübo Russia-i aziüoka lir.

Moscow-i Russia nunger sepaitemi mazüokteti aliba tesemtem nungi Ukraine nunger sepaitem anintsü akhanger, ajisüaka Ukraine-i memulunger aser parnok tazüokba kübok aliba litsü magütsütsü ta shia arudar.

Yimjung atema tenangzüktepba nung shilem ka ama Ukraine nunger litsü Russia nem agütsütsü benoker aliba ya Zelenskyy-i magizüki arudar. Ajisüaka Trump aser Kyiv Mayor Vitali Klitschko nati taoba mapang, küm pezü dak tema raraba rara ya tembangdaksüti süra Ukraine-i iba thakhangba ya agütsütsüsa akümtsü ta shiogo.

K e t d a n g s ü r t e m i Bresthostibarnü ashiba agi, Ukraine nunger yimjung atema sensaksem Rustem Umerov, Russia den rara tembangdaksütsü atema US nunger ketdangsürtem den sensemtsü atema Miami tongogo.

US teyongtsü ia iba rara tembangdaksütsü atema joko mapang tatsüka sensaksemba arudar, saka US aser Israel nati Iran amak tenzükba sülen iba sensaksem ya tejakdangi tongtpoka bener moteti bangdaka lir.

Kasa mapang nung yimjung atema sensaksemaka-aka linük anati kati ka maneni maktepdar, aser Ukraine-i asendenshir Russia indang energy infrastructure tem tanen makai maka arudar.

donesia-i aru ta meteter liasü, ta ashiba den, parnoki bendanger customer tem dak timba rangloker inyaksangshir, ta shisem.

Interpol Indonesia nung ketdangsür Untung Widyatmoko-i osangbenertem den sensaksemba mapang ashiba agi, Cambodia nung yimtittem nungi Indonesia-i online gambling operation tem ya belener arur.

Anogo ana tejakdanga bendangertem aika puogo. Hokolbarnü Indonesia indang immigration ketdangsürtemi Singapore nungi km 20 pilar aliba Batam asetkong nung online investment scam tem nung densema aliba bendanger 210 pua liasü.

Office of the
LONGMISA SENSO MUNG DANG
P.O.Mokokchung – 798601 B.P.O Longmisa
Mokokchung : Nagaland

TENÜNGSANG AGÜTSÜR

Longmisa Senso Mungdang ajanga tenungsanga Shri.Imotoshi S/O Lt. Lanutuden, Headmaster jenjang Govt. High School Longmisa,School Education Department nung ajangzuketba asoshi konang tetushi agutsur.

Asen Teyanglur Tsungremi nu takum, kibong aser wadang ajak nung maneni moajangma.

Sd/-	Sd/-
Pangersosang,	I.Senkanungba Ao,
President LSM.	G.Secretary LSM.

Israel-i Lebano amak; nisung 20 tepsetogo



Beirut, Monupii/May 9 (Agencies): Israel-i anüing ajanga southern Lebanon amakba sülen civil defence rescuer ka densema nisung 20 tepsetogo, ta Lebanese state meyong media sangdong ka ajanga metetdaksü. Israel aser Hezbollah na tsüingda ceasefire benoker liaka tang iba lendong ya atalokogo.

Lebanese health ministry sangdong ka ajanga ashiba agi, Israel-i anüing ajanga Hokolbarnü Tyre district kübok Toura jila amakba mapang tetsür ana densema nisung pezü tepset aser tangar ti yiruja liasü.

Lebanon indang National News Agency (NNA)-i ashiba agi, tetsür chanu ya ki teraksa nung sabanger aliba kümzüksü asoshi tekümzükba maparen maneni inyakdar.

Kasa sangdong ajangsa, Bresthostibarnü Israel-i anüing ajanga Marjayoun district kübok Blat jila amakba sülen asangur ana samar bushia aliba tasü mang Lebanese Red Cross team temi ngutetogo, ta metetdaksü.

NNA-i, Hokolbarnü tanga tesemtem den külemi Nabatieh, Bint Jbeil aser Sidon district makogo, ta metetdaksü. Jila aser yimtsüing balala nung nisungtem asüba osang angazükogo, ta NNA-isa metetdaksü.

Kasa mapang nung Israel indang army drone kati Hasbaya district nung Kfarchuba aser Kfarhamam na sendaktepba lenmang nung gari ka maka liasü, iba mapang civil defence züngsem ka tepset, ta

General Directorate of Civil Defence-i ashi.

Lebanon indang Ministry of Health-i ashiba agi, taoba ghonda 24 tsüingda Israel-i tesem balala amakba mapang nisung 50 tepsetogo.

Israeli army otongdar Avichay Adraee-i ashiba agi, Nmairyeh, Tayr Felsay, Hallousiyyeh, Upper Hallousiyyeh, Toura aser Maarakeh jila aser yimtsüing nung alirtem dang parnok aliba tesem toktsür asoshi shiogo.

Ceasefire benoker liaka Hezbollah aser the Israel army na April 17 nü nungi maneni rara arudar, aser Israel-i arrtsü nung aliba tesemtem aziükogogo.

Israel army-i ashiba agi, northern Israel nung Hezbollah-i yokba drone ka agi sepai ana yirutsüogo. Ano southern Lebanon nung Israel nunger sepaitemi aziüoker aliba tesem ka drone agi amakba sülen sepai ka yiruogo.

PROCLAMATION REQUIRING ATTENDANCE OF DEFENDANT
(Order 5, Rule 20 of the Code of Civil Procedure)

IN THE COURT OF MS. NIRJA BHATIA, L.D. DISTRICT JUDGE (COMMERCIAL COURT-07), SOUTH-EAST DISTRICT ROOM NO.30, NEW BLOCK-02, SAKET COURTS, NEW DELHI.

SUIT NO: CS(COMM)/184/2026
State Bank Of IndiaPlaintiff
V/S
Rahul KumarDefendant

To,
Rahul Kumar S/o Om Prakash Singh
R/o Razaphe, Dimapur Nagaland-797112. Ph-9149023354

WHEREAS you are intentionally evading service of summons it is hereby notified that if you shall not defend the case on the **14.05.2026** the day fixed for the final disposal, it will be heard & determined ex-parte.

Given under my hand and the seal of the Court, this **22.04.2026**.

District Judge (Commercial Court-07)
South-East District Saket Court Complex,
New Delhi

Real Madrid-i Valverde aser Tchouameni na dang senchi achi



Valverde aser Tchouameni

Monupii/May 9, 2026 (Agencies): Training ground nung mangatettep adoka Valverde mozüki anir aotsüsa akümbe sülen Real Madrid-i club nungi asayar Aurelien Tchouameni aser Federico Valverde na dang senchi euro 500,000 chiogo.

Club-i asaya dak sendakba nung asayar ana nem kecha tenokdangba magütsü, aser ashiba agi senchi achiba ajanga club yongtsü nung dena anema inyakyim benokba tembanger.

Asayar ana mangatettep adokba sülen Valverde tekolak yiru aser ibayongji pa Deobarnü Barcelona den Clasico masayatetsü. Club-i ashiba agi, pa hopta ana masayatetsü.

Tchouameni Hokolbarnü

training nung shilem agiogo, aser pa Camp Nou nung asayatsü aliba asaya nung ya asayatsü akok.

Madrid-i Hokolbarnü ashiba agi, asayar anapronglai iba tatalokba atema sasa bilemba lemsatepba den kati ka dang tatok meshitepogo.

"Tenati club, parnok teammate, coaching staff aser fan tem dang tatok meshiogo, aser club-i kechi temereshi agütsüdir agizüksü ta shiogo," ta club sangdong ajanga metetdaksü.

Uruguay nunger international asayar Valverde ya club indang Valdebebas training complex anasa mozüki kati Madrid coach Alvaro Arbeloa-i anir ao, ta Spain nung media sangdong balala ajanga

metetdaksü. Osang ajanga ashiba agi pa tejak yiru aser artsüsa aküm.

"Tetoktepba sashiraba aser tezüdang balala aliba ajanga tensa tamajungba aküm," ta Valverde-i social media ajanga ashi.

"Mangatettep adokba mapang ni tenütsü tsüka yiru aser mozükidangi oa anepalutsüsa aküm," ta pai ashi.

"Bangsentepba mapang kü indang teammate-i kü dang mazük aser nia pa dak mazük," ta Valverde-isa shisem.

Osang ajanga ashiba agi, asayar ana ya Bodhbarnü training mapang mangatettep adok aser Brehostibarnü training tembangba sülen maneni bangsentepa liasü.

Spanish media sangdong balala ajanga ashiba agi, Valverde-i Tchouameni den salemsü memulung aser iba sülen Brehostibarnü training session mapang pa alangdakja liasü. Iba sülen dena dressing room nung mangatettep adokba mapang Valverde yiru.

Season anabuba tongtibang takok marok ka danga mokokteti tembangtsü lia Real Madrid nung tensa mejungi lir.

La Liga nung parnoki Barca pur point 11 agi memenepe lir, aser Hansi Flick-i aniba team ya Deobarnü tamakok mongura parnoki league akoktsü.

Fernandes nem FWA Footballer of the Year naroküm agütsü



Monupii/May 9, 2026 (Agencies): Manchester United captain Bruno Fernandes nem Football Writers' Association men's player of the year naroküm agütsüogo. Season tepeyong goal idaktsütsü atema teyari kanga junga asaya-a par team Champions League nung asayatetsüsa teyari agütsüba sülen pa nem iba naroküm ya agütsüogo.

Kasa mapang nung tetsürtem rongnungi Manchester City forward Khadija "Bunny" Shaw-i iba naroküm ya anabenbuba nguogo.

Fernandes-i tang asaya aliba season nung league nung goal ti aser assist 19 süja lir, aser asaya asem asayatsü anunga lia Thierry Henry aser Kevin De Bruyne nati assist sütsüba nung otsü tasen yanglur aliba meneptsü asoshi goal ka dang assist sütsütsü nüngdaka lir.

Iba naroküm atema arishi küm 31 tain Portugal nunger midfielder yagi Arsenal nungi asayar runner-up Declan Rice vote 28 ajateta liasü. Tasembuba jenjang nung Manchester City

striker Erling Haaland liasü.

Wayne Rooney-i 2010 küm iba naroküm agizükba sülen Fernandes ya iba naroküm agizükba United nungi asayar mezüngbuba kümogo.

Fernandes-i teyari tulu agütsüba den interim manager Michael Carrick-i coach mapa agizükba sülen team jenjang yanglushia parnok Premier League nung tasembuba jenjang nung lir aser küm ana sülen parnok maneni taruba season Champions League asayatsü jangaogo.

Kasa mapang nung Jamaica tsür Shaw, shibai 2024 küm women's player of the year naroküm agizüka liasü, lai anir City puri küm 10 tsüngda taküm mezüngbuba Women's Super League (WSL) title benogo.

Shaw-i asaya 21 nung goal 19 idaktsü aser la season asembuba atonga Golden Boot angutsü. Lai vote aika agi Arsenal nungi asayar Alessia Russo ajateta iba naroküm nguogo. Tetsürtem rongnungi Chelsea nungi asayar Lauren James tasembuba jenjang nung liasü.


WFI-i Vinesh Phogat nem tenokdangba agütsü

Monupii/May 9, 2026 (Agencies): Wrestling Federation of India (WFI)-i Honibarnü Vinesh Phogat nem show-cause notice ka agütsüogo, aser lai asaya inyakyim sülen shitak manikdakba aser anti-doping temzüng ozüng nung aibelenba atema aitsüogo.

UWW Anti-Doping Rules kübok asayar ka asaya nungi anisüngzüker meyipa arua asayatsü asoshi ita trok jelia osang agütsütsü nüngdaka aliba metembangjui asayatsü merangba atema la domestic asayamungtem nung 2026 küm June 26 tashi masayatetsü ta sangdongogo.

Notice nung WFI-i, Vinish inyakyim ajanga linük ajunga maksüdaksüogo, Indian wrestling noksa raksatsüogo aser WFI Constitution, UWW International Wrestling Rules aser anti-doping regulations nung provision tem anema inyakogo, ta shia lir.

Federation-i, broad charges pezü atema telangzükba agütsütsü asoshi la nem tetuyuba agütsüogo, kong la 2024 Paris Olympics nung disqualify asüba, anti-doping rules kübok la kolen ali memetdaksüba aser 2024



Vinesh Phogat

küm March ita selection trial mapang weight category ana nung toktepba densema lir.

Federation-i, la taküm June 26 tashi domestic asayamungtem nung shilem magitetsü ta jangja jangja metetdaksüogo, kong Gonda nung National Open Ranking Tournament densema lir. Iba asayamung ya May 10 nungi 12 tashi asayatsü aser la meyipa arur asayaba mezüngbuba asayamung asütsü liasü.

Taoba mapang Vinesh-i lai la asaya nungi anisüngzükba officially mesangdong asünung la meyipa arur asayatsü asoshi ita trok jelia osang agütsütsü nüngdak mali ta ashiba osang

ka ajanga metetdakja liasü.

"Vinesh-i UWW nem osang agütsütsü nüngdaka maliasü, kechiyong la iba asaya nungi officially anisüngzükba sangdonga mali," ta Vinesh den sendaktepa aliba source kati ashiba Deccan Herald-i sangdonga liasü.

"Ibayongji la tang tashi RTP list nung lir aser December 18 nü tia maka la Julana constituency nungi representative ama Haryana Legislative Assembly mezüngbuba winter session nung adentsü atema Bengaluru nungi Chandigarh-i oya aliba ajanga test nung shilem magitet," ta source yagisa shisem.

Messi-i Brazil World Cup squad nung Neymar züngoksemdaktsüner

Monupii/May 9, 2026 (Agencies): Lionel Messi-i taoba mapang Barcelona nung külemi asayar Neymar, taküm World Cup atema Brazil indang squad nung züngoksemdaktsünüba lemsatepogo.

Pai ashiba agi, Neymar temang kangabo majungba ajanga tebilemtsü liaka pa ya alima nung asayar tajungtiba ka lir.

Neymar ya Brazil nunger asayatem rongnung linük atema asayaba mapang goal timtiba idaktsüba asayar lir, aser pai tang tashi nung goal 79 idaktsür lir. Ajisüaka pa temekok kanga mejungi yiruba ajanga 2023 küm October ita nungi tang tashi national team nungi khen danga asaya mali, aser taoba küm Santos-i meyipa aoba sülen junga masayateti arudar.

Brazil coach Carlo Ancelotti-i taküm küm tetenzüklen coach mapang agizükba sülen Neymar ya khen danga shima mali, saka pa temang anema lira World Cup indang squad nung züngoksemtsü atema asadangtsü ta shiogo. Paisa, April ita Neymar-i pa renema lir ta sayutsü atema ita

ana anunga lir, ta shiogo.

"Asenok ajaki asayar tajungtibatem World Cup nung asayadaktsüner aser Neymar ya form nung liang teli pa ya asayar tajungtiba rongnung ka lir," ta Messi-i Lo del Pollo show nung shilem agiba mapang ashi.

"Pa World Cup nung asayatetra jangrademtsüka asütsü, kechiyong pa ya Brazil aser football asaya atema kanga tongtibang lir," ta paisa shisem.

Messi, shiba lenisüba nung Argentina team-i 2022 küm Qatar nung World Cup kokogo, pa iba asayamung nung taküm tatembangbuba asayatsü imlar, aser pai Spain aser France na den Brazil ya-a asayamung akoktsü imlar rongnung ka lir ta ashi.

"Brazil ya asayamung akoktsü imlar rongnung ka ta ni amanger aser iba asayamung aser tanga tongtibang asayamung mashika akoktsü atema Brazil team nung tenüngdakba asayatem lir," ta pai ashi.

2026 World Cup ya Canada, United States aser Mexico nung ayongzükba asayatsü, koba June 11 nü tenzüktsü lir.

BILEMDANGANG

"Nütsüi na tama meimer aser iba sülen teti meimer."